

**Ni Presidente
Henry B. Eyring**

Umuna a Mammagbaga
iti Umuna a Panguluén



Nagungaren!

Ti pammaneknek maipapan iti kinapudno ti Panagungar ni Jesucristo ket pagtaudan ti agpada a namnama ken determinasion. Ket ti Panagungar ni Jesucristo ket mabalin a pagtaudan ti namnama ken determinasion para iti asino man nga anak ti Dios. Para kaniak manipud pay idi pimmusay ni nanangko kadaydi nga aldaw ti kalgaw iti Hunio 1969, ti Panagungar ni Jesucristo ti pagtaudanen ti namnamak ken determinasionko agingga ita, ken agingga a maki-takto manen isuna.

Ti kinaladingit manipud iti di agpaut a panagsina ket dagus a nasukatan iti kinaragsak. Nangnangruna pay daytoy ngem iti maysa a namnama para iti naragsak a panagtitipon. Gapu ta nakaad-adun ti impalgak ti Apo babaen dagiti propetana ken gapu ta impatalged kaniak ti Espiritu Santo ti kinapudno ti Panagungar, makitak iti panunotko no anianto ti kayarigan ti pannakitipon-tayo manen kadagiti napasanto ken nagungar nga ipatpategtayo:

“Dagitoy dagiti rummuarto iti panagungar dagiti nalinteg. . . .

“Dagitoy dagiti naisurat ti nagnaganda iti langit, a ti Dios ken ni Cristo ti ukom ti amin.

“Dagitoy dagiti nalinteg a tao a nagbalin a naan-anay babaen ni Jesus a mangibabaet ti baro a katulagan, a nagipatungpal daytoy naan-anay a pannubbot babaen ti panagsayasay ti bukodna a dara” (DkK 76:65, 68–69).

Gapu ta pinarmek ni Jesucristo ti pannakatay, amin

nga annak ti Nailangitan nga Ama a mayanak iti lubong ket agungarto iti bagi a dinton pulos matay. Ngarud ti pammaneknekko ken ti pammaneknekyo maipapan iti dayta nagloriaan a kinapudno ket mangikkatto iti saem ti pannakapukaw ti maysa nga ipatpateg a miembro ti familia wenna gayyem ket masukatan daytoy iti naragsak a panangnamnama ken natibker a determinasion.

Inikkannatayo amin ti Apo iti sagut ti panagungar, a pakaipanan dagiti espiritutayo kadagiti bagi nga awanan kadagiti pagkurangan iti bagi (kitaen iti Alma 11:42–44). Kasla ubing ken naragsakto ni nanangko, maikkat dagiti epekto ti panagbaket ken dagiti adu a tawen ti panagsagaba ti bagi. Dumtengto dayta a sagut ti panagungar kenkuana ken kadakami kas maysa a sagut.

Ngem dakami nga agtarigagay a makidennanto kenkuana iti agnanayon ket nasken nga agaramidkami kadagiti pili tapno maikari iti dayta a pannakitipon, tapno makipagnaedkami iti Ama ken ti Ay-ayatenna a nagungar nga Anakna iti gloria. Dayta laeng ti lugar a mabalin a pakaituloyan ti panagbiag ti familia iti agnanayon. Ti pammaneknekko maipapan iti dayta a kinapudno ket nangnayon iti determinasionko a mangpaikari iti bagik ken dagiti patpatgek iti kangatuan a tukad ti celestial a pagarian babaen ti Pannubbot ni Jesucristo a tumartarabay iti biagtayo (kitaen iti DkK 76:70).

Ikkannatayo ti Apo iti maysa a pangiwawan iti daytoy a panagsapsapul iti agnanayon a biag kadagiti kararag ti sakramento a mangtulong kaniak ken

makatulong kadakayo. Maawistayo a mangpabaro kadagiti katulagantayo iti panagbuniag iti tunggal miting ti sakramento.

Ikaritayo a kanayon a manglaglagip iti Mangisalak. Dagiti tanda ti sakripisiona ket mangtulong kadatayo a mangbigbig iti kalaus ti saem a sinagabana a mangparmek iti ipapatay, tapno maipaayantayo iti asi, ken tapno mangted iti pannakapakawan iti amin a basbasoltayo no pilientayo ti agbabawi.

Ikaritayo ti agtungpal kadagiti bilinna. Ti panagbasa kadagiti nasantuan a kasuratan ken dagiti balikas dagiti sibibiag a propeta ken panagdengngeg kadagiti naparegta nga agsarita kadagiti mitingtayo iti sakramento ket mangipalpalagip kadatayo kadagiti katulagantayo a mangaramid iti dayta. Ti Espiritu Santo ti mangipalagip ken mangiparikna kadatayo kadagiti bilin a nasken unay a tungpalentayo iti dayta nga aldaw.

Kadagiti kararag ti sakramento, ikari ti Dios nga ibaonna ti Espiritu Santo a mangkadmada kadatayo (kitaen iti Moroni 4:3; 5:2; DkK 20:77, 79). Natakataak iti dayta a kanito a maikkannak ti Dios iti kasla maysa a personal a pannakiuman. Impalagipna kaniak no ania ti naaramidko a nangparagsak Kenkuana, ti kasapulak a panagbabawi ken pannakapakawan, ken ti nagnagan ken ruprupa dagiti tao a kayatna a pagserbiak para Kenkuana.

Kadagiti napalabas a tawen, dayta a naulit a padas ket namagbalin ti namnama kadagiti rikna ti panangngaasi ken nangisangbay iti pammatalged a ti asi ket naited kaniak babaen ti Pannubbot ken Panagungar ti Mangisalak.

Paneknekak a ni Jesus ti nagungar a Cristo, ti Mangisalakantayo, ken ti naan-anay a pagwadan ken mangiwanwan kadatayo nga agturong iti agnanayon a biag.

PANANGISURO MANIPUD ITI DAYTOY A MENSAHE

Masapul nga “[aramententayo] amin a nasantuan a kasuratan kadatayo, tapno agbalinda koma a pakairanudan ken pagadalantayo” (1 Nephi 19:23). Ibilang ti panangbasayo kadagiti kararag ti sakramento, a masarakan iti Doktrina ken Katulagan 20:76–79. Kalpasan ti panangbasayo kadagiti panursuro ni Presidente Eyring maipapan kadagiti kararag ti sakramento, mabalina a kayatyo nga awisen dagiti sursuranyo a mangpanunot kadagiti wagas a mabalina a pakaiwanwanan dagitoy a kararag iti biagda ken makatulong kadakuada nga agsubli a makipagnaed manen iti Nailangitan nga Ama ken ni Jesucristo.

AGTUTUBO

Ti Personal a Pannakiumanmo iti Dios

I sursuro ni Presidente Eyring a no dumngegtayo kadagiti kararag ti sakramento, mariknatayo a kasla adda personal a pannakiumantayo iti Dios. Pampanunoten ni Presidente Eyring dagiti sumaganad a tallo a tay-ak. Ibilang ti panangisuratyo kadagitoy a saludsod iti diurnalyo ken panangutobyo kadagitoy iti tunggal Domingo iti daytoy a bulan. Bayat ti panangutob ken panangawatyo kadagiti parikna manipud iti Espiritu Santo, mabalinyo pay nga isurat maipapan kadagiti adda iti diurnalyo.

- Ania ti naaramidkon a nangparagsak iti Dios?
- Ania ti nasken a pagbabawyak wenno idawatan iti pannakapakawan?
- Asino ti kayat ti Dios a pagserbiak?



Pammati • Pamilia • Tulong

Dagiti Katulagan iti Templo

Sikakararag nga adalenyo daytoy a material ken, no maitutop, ilawlawagyo daytoy kadagiti kakabsat a babbai a sarungkaranyo. Usarenyo dagiti saludsod a mangtulong kadakayo a mangpapisga kadagiti kakabsatyo a babbai ken mangaramid iti Relief Society nga aktibo a paset iti bukodyo a biag. Para iti ad-adu pay nga impormasion, mapan iti reliefsociety.lds.org.

"Dagiti pangisalakan nga ordinansa a naawat iti templo a pakapalubosantayo a makasubli iti Nailangitan nga Amatayo iti maysa nga aldaw iti agnanayon a relasion ti pamilia ken ti maipaayan-tayo kadagiti bendision ken bileg manipud iti ngato ket kapateg iti tunggal sakripisio ken tunggal aramid a panagkagumaan," kinuna ni Presidente Thomas S. Monson. No saankayo pay a napan iti templo, makapagsaganakayo nga umawat kadagiti sagrado nga ordinansa iti templo babaen ti:

- Panamati iti Nailangitan nga Ama, ken ni Jesucristo, ken iti Espiritu Santo.
- Panangpatibker iti pammaneknek maipapan ti Pannubbot ni Jesucristo ken ti naisubli nga ebangheliona.
- Panangkanunong ken panangsurot iti sibibiag a propeta.
- Panagbalin a maikari iti maysa a rekomenda iti templo babaen ti panagbayad iti apagkapullo, panagbalin a nadalus iti dayaw, panagbalin a napudno, panagtungpal iti Word of Wisdom, ken panagbiagi a maitunos kadagiti pannursuro ti Simbaan.
- Pannangted iti panawen, talento, ken kinabaknang tapno makatulong iti pagarian ti Apo.

- Pannakiraman iti aramid iti family history.²

Innayon pay nga insuro ni Presidente Monson, "Bayat ti pananglagiptayo kadagiti katulagan nga aramidentayo iti uneg [iti templo], ad-adda a kabaelayonto nga ibturan ti tunggal panubok ken mangpamek iti tunggal pannulisog."³

Manipud kadagiti Nasantuan a Kasuratan

Doktrina ken Katulagan 14:7; 25:13; 109:22

Manipud iti Pakasaritaantayo

"Nasurok a 5,000 a Santo ti nagseksekan iti Nauvoo Temple kalpasan ti pannakaidatonna. . . .

"Ti pigs, bileg, ken dagiti bendision dagiti katulagan iti templo ti [nangtulong] kadagiti Santo iti Ud-udina nga Aldaw kabayatan ti panagdaliasatda nga [agpalaud], idi [sinagabada ti lamiis, pudot, bisin, kinakurapay, sakit, aksidente, ken ipapatay]."⁴

Kas iti adu a kakabsat a babbai iti Relief Society, nagserbi ni Sarah Rich kas maysa a temple worker. Insaritana maipapan iti padasna, "No saan koma a gapu iti pammati ken pannakaammo

a naipaay kadakami iti dayta a templo babaen . . . ti Espiritu ti Apo, ti panagdaliasatmi ket kasla koma iti maysa a tao nga agtap-puak iti kasipngetan. . . . Ngem adda pammatimi iti Nailangitan nga Amami, . . . nariknami a dakami dagiti napili a taona . . . , ken imbes nga agladingitkami, nagrag-okami gapu ta dimtengen ti aldaw a pannakaisalakanmi."⁵

Ti ipapanaw ket saan nga "itappuak iti kasipngetan" kadagiti napudno a babbai a Santo iti ududina nga aldaw. Natulongan ida dagiti katulaganda iti templo.

DAGITI NAGADAWAN

1. Thomas S. Monson, "The Holy Temple—a Beacon to the World," *Liahona*, Mayo 2011, 92.
2. Kitaen iti *Daughters in My Kingdom: The History and Work of Relief Society* (2011), 21.
3. Thomas S. Monson, *Liahona*, Mayo 2011, 93.
4. *Daughters in My Kingdom*, 29–30.
5. Sarah Rich, iti *Daughters in My Kingdom*, 30.

Ania ti Maaramidko?

1. Agdaydayawak kadi a kanayon iti templo?
2. Al-allukoyek kadi dagiti kakabsatko a babbai nga umawat kadagiti bendisionda iti templo?

© 2013 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/12. Pannakaanamongna a maipatarus: 6/12. Pannakaipatarus ti Visiting Teaching Message, April 2013. Ilokano.10664 864